

Сунъгъачнрин даалгъвр

Шидр, 4 ч номертӓ тосхлтин училищин герт сунъгъврин 3-ч номертӓ Централън округин болн сунъгъврин 7-ч номертӓ Гоголевск округин сунъгъачнр эврӓннь депутатнрин кандидатнрла харгъв.

Турун болдж итклтӓ кун, 2-ч номертӓ долан джилӓ школин багш М. П. Зуева уг келв:

—Иванов Николай Лиджинович, мана депутатин кандидат, багъасн авн байн улст заргддж, мал хӓрулдж йовсмн. Зуг советин йосна нилчӓр угатя кунӓн ковун, гун сургъульта, ик медрлтӓ болдж гарсмн.

Одгӓ цагт уг Иванов Элст балгъсна эрдм-сургулин отделин заведующ кодллжӓнӓ.

Октябрин 19-д, сунъгъврин ӓдрлӓ, цуг сунъгъачнриг нег дуугъар уг Ивановин тӓлӓ дуугъан ӓгхиг дууджанав, — гидж М. П. Зуева келв.

Энунлӓ бас Элстин промкомбинатин кодлӓч Б. Шивлянов збвшӓрв.

—Боскомджиева Бося Эневна, Иджл голин ковӓд, загъсч кунӓн булд тӓрсмн, — гидж, итклтӓ кун, 2-ч номертӓ детсадин заведующ Мария Ивановна Мусова келв.

—Би эн депутатин кандидатсиг хойрагъинь таньдув, — гидж 1-ч номертӓ детсадин заведующ Анна Васильевна Доскина эврӓннь угдӓн келв.

Дакад бидн эн улсд даалгъвр ӓгчӓнӓвдн. Мана республикин центр джил ирвӓс ӓмтнӓ тоогъарн ӓсӓд йовна. Учр тиим болсар, бичкдуд чигн ӓсдж бӓӓнӓ, тиигхлӓ школмуд кергтӓ. Мана бичкдудин учреждень йир му бӓӓдлд бӓӓнӓ. Эн тоотиг мана кандидатир депутат болсн цагтан Деед Советин куундврт кургдж келтхӓ.

Финансовый отделин кодлӓч Грязев, балгъсна уульнцсиг ясхмн гилж даалгъвр ӓгв. Сунъгъач, пенсионерк Ульяна Шалхакова фронтд алгдсн улсин булд, пенсийд гарсн медитӓ улст бас оньган ӓгтн гидж келв.

Сунъгъврин 3-ч номертӓ округин депутатин кандидат Иванов Николай Лиджинович болн сунъгъврин 7-ч номертӓ округин депутатин кандидат Боскомджиева Бося Эневна хойр келсн угдӓн, сунъгъачнрин даалгъвриг куцӓхвдн, итклдтн икӓр ханджанавдн гидж келцхӓв.

Эн харгъврт ирсн улс дунд далн нӓӓмтӓ Шапа Альманович Саргинов, далта Екатерина Николаевна Абушинова болн нань чигн кесг медӓтӓ улс ирцхӓв.

Харгъврин суулӓр Элстин культурин Герин нӓр наадтӓвдг коллектив сунъгъачнрт концерт узулв.

А. БАРУНСКИЙ.